

四庫全書

史部

欽定四庫全書

史部

前漢書

八十八至
九十一

詳校官侍讀臣陳萬青

洗馬臣王坦修覆勘

覆校官中書臣陳 墉

校對官中書臣馮 培

謄錄舉人臣李敷文

欽定四庫全書

前漢書卷八十八

漢 蘭 臺 令

史班 固撰

唐正議大夫行祕書少監琅邪縣開國子顏師古注

儒林傳第五十八

古之儒者博學廣文

師古曰六藝謂易禮樂詩書春秋

六學者

王教之典籍先聖所以明天道正人倫致至治之成法也周道既衰壞於幽厲禮樂征伐自諸侯出陵夷二百

餘年而孔子興

師古曰陵夷言漸頽替。宋祁曰注文頽替字下疑有也字。

以聖德

遭季世知言之不用而道不行廼歎曰鳳鳥不至河不

出圖吾已矣夫

師古曰論語載孔子之言鳳鳥河圖皆王者之瑞自傷有德而無位故云已矣

文王既沒文不在茲乎

師古曰言文王久已沒矣文章之事豈不在此乎蓋自謂也亦

見論語

於是應聘諸侯以答禮行誼

師古曰答禮謂有問禮者則為應答而申

明之。劉奉世曰答禮者迎之有禮亦以禮答之。

西入周南至楚畏匡厄陳

師古

曰匡邑名即陳留匡城縣孔子貌類陽貨陽貨嘗有怨於匡匡人見孔子以為陽貨也故圍而欲害之後得免

耳厄陳謂在陳絕糧也

奸七十餘君

師古曰奸音干

適齊聞韶三月不知

肉味

師古曰美舜樂之善也

自衛反魯然後樂正雅頌各得其所

師古曰自衛反魯謂哀十一年也是時道衰樂廢孔子還修正之故雅頌各得其所究觀古今之

篇籍迺稱曰大哉堯之為君也唯天為大唯堯則之

師古

曰言堯所行皆法天

巍巍乎其有成功也煥乎其有文章也

師古曰巍巍

巍者高貌煥明也

又曰周監於二世郁郁乎文哉吾從周

師古曰言

周追視夏殷二代之制而損益之故禮文大備也郁郁文章盛貌自此以上孔子之言皆見論語○劉攽曰世

改於是叙書則斷堯典

師古曰謂尚書起自堯典也

稱樂則法韶舞

師古曰論語云顏淵問為邦子曰行夏之時乘殷之輅服周之冕樂則韶舞放鄭聲韶舞樂也孔子歎其盡善

盡美故
欲用之

論詩則首周南

師古曰以關
雎為始也

綴周之禮因魯春

秋舉十二公行事繩之以文武之道成一王法

師古曰
繩謂治

正至獲麟而止蓋晚而好易讀之韋編三絕而為之傳

師古曰編所以聯次簡也言愛玩之甚故編簡之
韋為之三絕也傳謂象象繫辭文言說卦之屬

皆因

近聖之事以立先王之教故曰述而不作信而好古下

學而上達知我者其天乎

師古曰皆論語載孔子之言
也作者之謂聖述者之謂明

故孔子自謙言我但述者耳下學上達謂下學
人事上達天命也行不違天故唯天知我也

仲尼既

沒七十子之徒散游諸侯

師古曰七十子謂弟子者七
十七人也稱七十者但言其

成數也。○宋祁曰：注文弟字下疑有達字。

大者為卿相師傅，小者友教士。

大夫或隱而不見，故子張居陳。

師古曰：子張姓顓孫名師。

澹臺子羽。

居楚。

師古曰：子羽姓澹臺，名減明。澹音徒甘反。

子夏居西河。

師古曰：子夏姓卜名商。

子

貢終於齊。

師古曰：子貢姓端木名賜。○宋祁曰：貢蕭該本作贛淳化本景本作子貢，刊誤改作贛。又

云子貢當為子夏。

如田子方段干木、吳起、禽滑釐之屬，皆受業。

於子夏之倫為王者師。

師古曰：子方以下皆魏人也。滑音于拔反。釐音離。

是時

獨魏文侯好學，天下並爭於戰國，儒術既黜焉。然齊魯之間，學者猶弗廢。至於威宣之際，孟子孫卿之列，咸遵

夫子之業而潤色之以學顯於當世鄧展曰威宣齊二王及至秦

始皇兼天下燔詩書殺術士師古曰燔焚也今新豐縣温湯之處號慈儒鄉温湯

西南三里有馬谷谷之西岸有坑古老相傳以為秦坑儒處也衛宏詔定古文尚書序云秦既焚書患苦天下

不從所改更法而諸生到者拜為郎前後七百人迴密令冬種瓜於驪山坑谷中温處瓜實成詔博士諸生說

之人人不同乃命就視之為伏機諸生賢儒皆至焉方相難不決因發機從上填之以土皆壓終乃無聲此則

閔儒之地其不謬矣燔音扶元反六學從此缺矣陳涉之王也魯諸儒

持孔氏禮器往歸之於是孔甲為涉博士卒與俱死師古

曰孔光傳云鮒為陳涉博士死陳涉起匹夫毆適成

下今此云孔甲將名鮒而字甲也

陳涉起匹夫毆適成

以立號

師古曰歐與驅同適讀曰謫

不滿歲而滅亡其事至微淺然

而搢紳先生負禮器往委質為臣者何也以秦禁其業

積怨而發憤於陳王也及高皇帝誅項籍引兵圍魯魯

中諸儒尚講誦習禮弦歌之音不絕豈非聖人遺化好

學之國哉於是諸儒始得修其經學講習大射鄉飲之

禮叔孫通作漢禮儀因為奉常諸弟子共定者咸為選

首然後喟然興於學

師古曰喟然歎息貌音丘位反

然尚有干戈平定

四海

師古曰言陳稀盧縮韓信黥布之徒相次反叛征伐也

亦未皇庠序之事也

師古曰孝惠高后時公卿皆武力功臣孝文時頗登用

皇暇也師古曰言少然孝文本好刑名之言及至孝景不任儒

用文學之士竇太后又好黃老術故諸博士具官待問未有進者師古

曰具官謂備員而已漢興言易自淄川田生言書自濟南伏生言

詩於魯則申培公於齊則轅固生師古曰培固者其人

皆類此培音培韋昭曰培公之名也燕則韓太傅師古曰言禮則魯高堂

生言春秋於齊則胡毋生於趙則董仲舒及竇太后崩

武安君田蚡為丞相黜黃老刑名百家之言延文學儒

者以百數而公孫弘以治春秋為丞相封侯天下學士

靡然鄉風矣

師古曰鄉讀曰嚮

弘為學官悼道之鬱滯廼請曰

丞相御史言

師古曰自此以下皆弘奏請之辭。宋祁曰景德本無悼字刊誤據史記作悼道据

南本作以道

制曰蓋聞導民以禮風之以樂

師古曰風化也婚姻者

居室之大倫也

師古曰倫理也

今禮廢樂崩朕甚愍焉故詳延

天下方聞之士咸登諸朝

師古曰詳悉也方道也有道及博聞之士也。宋祁曰延

字刊誤據史館本添入

其令禮官勸學講議洽聞舉遺興禮以為

天下先

師古曰舉遺謂經典遺逸者求而舉之

太常議予博士弟子崇鄉

里之化以厲賢材焉

師古曰厲勸勉之也一曰砥厲也自此以上宏所引詔文

謹與

太常臧博士平等議

師古曰臧孔臧也

曰聞三代之道鄉里有

教夏曰校殷曰庠周曰序

師古曰教效也言可效道莠也

其勸善也顯

之朝廷其懲惡也加之刑罰故教化之行也建首善自

京師始繇內及外

師古曰繇音由由從也

今陛下昭至德開大明

配天地本人倫勸學興禮崇化厲賢以風四方太平之

原也

師古曰風化也○宋祁曰姚本改厲賢作屬賢

古者政教未洽不備其禮

請因舊官而興焉為博士官置弟子五十人復其身

師古

曰復音方目反

太常擇民年十八以上儀狀端正者補博士弟

子郡國縣官有好文學敬長上肅政教順鄉里出入不

悖

師古曰悖乖也音布內反

所聞令相長丞上屬所二千石

師古曰聞謂聞

其部屬有此人也令縣令相侯相長縣長丞縣丞也二千石謂郡守及諸王相也○劉敞曰所聞當屬上句讀之則亦不煩訓詁矣二千石謹察可者常與計偕

師古曰隨上計吏俱至京師

詣太常得受業如弟子一歲皆輒課能通一藝以上補

文學掌故缺其高第可以為郎中太常籍奏

師古曰為名籍而奏

○宋祁曰注文為字下疑有之字

即有秀才異等輒以名聞其不事學

若下材及不能通一藝輒罷之而請諸能稱者

師古曰謂列其

能通藝業而稱其任者奏請補用之也

臣謹案詔書律令下者

師古曰下謂班行也

明天人分際

師古曰分音扶問反

通古今之誼文章爾雅訓辭深

厚

師古曰爾雅近正也言詔辭雅正而深厚也

恩施甚美小吏淺聞弗能究

宣亡以明布諭下以治禮掌故以文學禮義為官遷留

滯

師古曰言治禮掌故之官本以有文學習禮義而為之又所以遷擢留滯之人。劉敞曰下以字衍言治

禮掌故其遷常留滯故請特選用以勸之請選擇其秩比二百石以上及吏

百石通一藝以上補左右內史大行卒史

師古曰左右內史後為左

馮翊右扶風而大行後為大鴻臚也

比百石以下補郡太守卒史皆各二人師古曰內地之郡郡各補太守卒史二人也邊郡一人先用誦多者不足

擇掌故以補中二千石屬

蘇林曰屬亦禮史今縣令文書解言屬某甲也○宋祁曰

注文禮史姚本作曹史

文學掌故補郡屬備員

師古曰云備員者示以升擢之非藉

其實用也○劉攽曰尋此文意本緣小吏弗能究宣詔書故使文學士布在州郡也然顏解未甚悉今區別言之治禮掌故以文學禮義為官遷留滯者言故治禮掌故令在他官而遷常留滯今遷之請選擇其秩比二百石以上及吏百石通一藝以上補左右內史大行卒史言文學掌故留滯在比二百石以上又百石通一藝皆補為左右內史大行卒史也吏乃以百石用者為其曉事優之也比百石以下補郡太守卒史皆各二人邊郡

一人言故文學掌故在留滯及史比百石皆補郡卒史也。不言文學掌故之在百石者與史百石同也。先用誦多者此數品先用誦多者也不足擇掌故言此數品不足則擇見方為掌故也。以補中二千石屬以與已同言。自比二百石至比百石為卒史者已而臨二千石屬也。有掾有屬卒史遷而為屬也。文學掌故補郡屬者即不足所擇用故但得為郡屬也。備員者總言此二者皆備員也。請著功令師古曰新立此條請以著

於功令功令篇師古曰此外它如律令師古曰此外制曰可自此以名若今選舉令師古曰此外如舊律令師古曰此外制曰可自此以

來公卿大夫士吏彬彬多文學之士矣師古曰彬彬文章貌音斌昭

帝時舉賢良文學增博士弟子員滿百人宣帝末增倍

之元帝好儒能通一經者皆復師古曰蠲其徭賦也復音方月反數年

以用度不足更為設員千人郡國置五經百石卒史成
帝末或言孔子布衣養徒三千人今天子太學弟子少
於是增弟子員三千人歲餘復如故平帝時王莽秉政
增元士之子得受業如弟子勿以為員師古曰常員之外更開此路
歲課甲科四十人為郎中乙科二十人為太子舍人丙
科四十人補文學掌故云

自魯商瞿子木受易孔子

師古曰商瞿姓也瞿音衢

以授魯橋庇子

庸

師古曰姓橋名庇字子庸它皆類此庇音必寐反○宋祁曰蕭該案史記橋音矯

子庸授江

東馭臂子弓

師古曰馭姓也音韓

子弓授燕周醜子家子家授東

武孫虞子乘子乘授齊田何子裝及秦禁學易為筮卜

之書獨不禁故傳受者不絕也

○宋祁曰越本無也字

漢興田何

以齊田徙杜陵號杜田生

師古曰高祖用婁敬之言徙關東大族故何以舊齊田氏

見徙也初徙時未為杜陵蓋史家本其地追言之也

授東武王同子中雒陽周王

孫丁寬齊服生皆著易傳數篇

師古曰田生授王同周王孫丁寬服生四人而

四人皆著易傳也子中王同字也中讀曰仲

同授淄川楊何字叔元元光中

徵為大中大夫齊即墨成至城陽相

師古曰姓即墨名成

廣川孟

但為太子門大夫魯周霸莒衡胡

師古曰莒人姓衡名胡也

臨淄主

父偃皆以易至大官要言易者本之田何

丁寬字子襄梁人也初梁項生從田何受易時寬為項

生從者讀易精敏材過項生遂事何學成何謝寬

師古曰告

令罷去

寬東歸何謂門人曰易以東矣

師古曰言丁寬得其法術以去。宋

初曰易以東矣或無以字注文法字當刪

寬至雒陽復從周王孫受古義號

周氏傳景帝時寬為梁孝王將軍距吳楚號丁將軍作

易說三萬言訓故舉大誼而已

師古曰故謂經之旨趣也它皆類此

今小

章句是也寬授同郡碭田王孫

師古曰碭者梁郡之縣也音唐又音宕

王

孫授施讎孟喜梁丘賀繇是易有施孟梁丘之學

師古曰繇

與由同後類此

施讎字長卿沛人也沛與碭相近讎為童子從田王孫

受易後讎徙長陵田王孫為博士復從卒業

師古曰卒業終也

與

孟喜梁丘賀竝為門人謙讓常稱學廢不教授及梁丘

賀為少府事多廼遣子臨分將門人張禹等從讎問讎

自匿不肯見賀固請不得已乃授臨等於是賀薦讎結

髮事師數十年

師古曰言從結髮為童
卅即從師學著其早也

賀不能及詔拜

讎為博士甘露中與五經諸儒雜論同異於石渠閣

師古

曰三輔故事云石渠閣在未央殿北以藏秘書也

讎授張禹琅邪魯伯伯為會

稽太守禹至丞相禹授淮陽彭宣沛戴崇子平崇為九

卿宣大司空禹宣皆有傳魯伯授太山毛莫如少路師古

曰姓毛名莫如字少路。宋初曰蕭該案漢書衆本悉作毛字風俗通姓氏篇渾屯氏太昊之良佐漢有屯莫如為常山太守又有毛姓云毛伯文王之子也見左傳漢有毛擣之為壽張令按此莫如非姓毛乃應作屯字音徒本反今人相承呼為毛忽聞為屯驚怪者多毛屯相似容是傳寫誤矣應劭解漢書世人皆用何為在風

俗通而

不信 琅邪郗丹曼容

○宋祁曰此下有曼容二字

著清名莫如至

常山太守此其知名者也繇是施家有張彭之學

孟喜字長卿東海蘭陵人也父號孟卿

師古曰時人以卿呼之若言公

矣

善為禮春秋授后蒼疏廣世所傳后氏禮疏氏春秋

皆出孟卿孟卿以禮經多春秋煩雜乃使喜從田王孫

受易喜好自稱譽得易家候陰陽災變書詐言師田生

且死時枕喜郝獨傳喜諸儒以此耀之

師古曰用為光榮也

同門

梁丘賀疏通證明之

師古曰同門同師學者也疏通猶言分別也證明明其偽也

曰

田生絕於施讎手中時喜歸東海安得此事又蜀人趙

賓好小數書後為易飾易文以為箕子明夷陰陽氣亡

箕子箕子者萬物方茲茲也

師古曰易明夷卦彖曰內文明而外柔順以蒙大難

文王以之利艱貞晦其明也內難而能正其志箕子以之而六五爻辭曰箕子之明夷利貞此箕子者謂殷父師說洪範者也而賓妄為說耳茲言其根茲方滋茂也茲音該又音皆賓持論巧慧易家

不能難皆曰非古法也

師古曰心不服

云受孟喜喜為名之

師古

曰名之者承取其名云實授也

後賓死莫能持其說喜因不肯

師古曰

亦名也

以此不見信喜舉孝廉為郎曲臺署長

師古曰曲臺殿

名署者主供其事也

病免為丞相掾博士缺衆人薦喜上聞喜改

師法遂不用喜喜授同郡白光少子沛翟牧子凡

師古曰凡

讀曰况

皆為博士繇是有翟孟白之學

梁丘賀字長翁琅邪諸人也以能心計為武騎從大中

大夫京房受易房者淄川楊何弟子也

師古曰自別一京房非焦延壽

弟子為課吏法者或書字誤耳不當為京房

房出為齊郡太守賀更事田王

孫宣帝時聞京房為易明求其門人得賀賀時為都司

空令坐事論免為庶人待詔黃門數入說教侍中

師古曰為

諸侍中說
經為教授

以召賀賀入說上善之

師古曰說於
天子之前

以賀為

郎會八月飲耐行祠孝昭廟

師古曰行
謂天子出

先毆旄頭劍挺

墮墜首垂泥中

師古曰挺引也劍自然引拔出也墜
古地字○宋祁曰垂字當作垂字

刃

鄉乘輿車

師古曰鄉
讀曰嚮

馬驚於是召賀筮之有兵謀不吉

上還使有司侍祠是時霍氏外孫代郡太守任宣坐謀

反誅

師古曰霍光傳云任宣霍
氏之壻此云外孫誤也

宣子章為公車丞亡在

渭城界中夜立服入廟居郎間

師古曰郎著皂衣
故章立服以廁也

執戟

立廟門待上至欲為逆發覺伏誅故事上常夜入廟其

後待明而入自此始也賀以筮有應繇是近幸為大中
大夫給事中至少府為人小心周密上信重之年老終
官傅子臨亦入說為黃門郎甘露中奉使問諸儒於石
渠臨學精熟專行京房法琅邪王吉通五經聞臨說善
之時宣帝選高材郎十人從臨講吉乃使其子郎中駿
上疏從臨受易臨代五鹿充宗君孟為少府駿御史大
夫自有傅充宗授平陵士孫張仲方

師古曰姓士孫名
張字仲方。劉奉

世曰臨代五鹿充宗代當為授後人
誤改之代充宗者召信臣亦非臨也

沛鄧彭祖子夏齊

衡咸長賓張為博士

○宋祁曰蕭該案風俗通姓氏篇云衡阿衡也伊尹官也見詩傳漢

有衡咸講學祭酒

至揚州牧光祿大夫給事中家世傳業彭祖

真定太傅咸王莽講學大夫繇是梁丘有士孫鄧衡之

學

京房受易梁人焦延壽

師古曰延壽其字名贛

延壽云嘗從孟喜

問易會喜死房以為延壽易即孟氏學翟牧白生不肯

皆曰非也至成帝時劉向校書考易說以為諸易家說皆祖田何楊叔丁將軍大誼畧同唯京氏為異黨焦延

壽獨得隱士之說

師古曰黨讀曰儻

託之孟氏不相與同房以

明災異得幸為石顯所譖誅自有傳房授東海殷嘉河

東姚平河南乘弘

師古曰乘姓也音食證反。劉敞曰今有乘姓音如乘黎之乘

皆為

郎博士繇是易有京氏之學

費直字長翁東萊人也

師古曰費音扶味反

治易為郎至單父令

師古曰單音善父音甫

長於卦筮亡章句徒以象象系辭十篇文

言解說上下經琅邪王璜平中能傳之

師古曰中讀曰仲璜又

傳古文尚書

高相沛人也治易與費公同時其學亦亡章句專說陰陽災異自言出於丁將軍傳至相相授子康及蘭陵毋將永康以明易為郎永至豫章都尉及王莽居攝東郡太守翟誼謀舉兵誅莽事未發康候知東郡有兵私語門人門人上書言之後數月翟誼兵起莽召問對受師高康莽惡之以為惑衆斬康繇是易有高氏學高費皆未嘗立於學官

伏生濟南人也

張晏曰名勝伏生碑云也

故為秦博士孝文時求能

治尚書者天下亡有聞伏生治之欲召時伏生年九十

餘老不能行於是詔太常使掌故朝錯往受之

師古曰衛宏定

古文尚書序云伏生老不能正言言不可曉也使其女傳言教錯齊人語多與潁川異錯所不知者凡十二

畧以其意屬讀而已

秦時禁書伏生壁藏之其後大兵起流亡漢

定伏生求其書亡數十篇獨得二十九篇即以教于齊

魯之間齊學者由此頗能言尚書山東大師亡不涉尚

書以教伏生教濟南張生及歐陽生張生為博士而伏

生孫以治尚書徵弗能明定是後魯周霸雒陽賈嘉頗

能言尚書云

師古曰嘉者賈誼之孫也

歐陽生字和伯千乘人也事伏生授兒寬寬又受業孔

安國至御史大夫自有傳寬有俊材

○宋初曰俊字當作雋

初見

武帝語經學上曰吾始以尚書為樸學弗好及聞寬說

可觀乃從寬問一篇歐陽大小夏侯氏學皆出於寬寬

授歐陽生子世世相傳至曾孫高子陽為博士

師古曰名高字

子陽高孫地餘長賓以太子中庶子授太子後為博士論

石渠元帝即位地餘侍中貴幸至少府戒其子曰我死

官屬即送汝財物慎毋受汝九卿儒者子孫以廉潔著

可以自成及地餘死少府官屬共送數百萬

○宋祁曰
越本無數

字其子不受天子聞而嘉之賜錢百萬地餘少子政為

王莽講學大夫由是尚書世有歐陽氏學

林尊字長賓濟南人也事歐陽高為博士論石渠後至

少府太子太傅授平陵平當梁陳翁生當至丞相自有

傳翁生信都太傅家世傳業由是歐陽有平陳之學翁

生授琅邪殷崇楚國龔勝崇為博士勝右扶風自有傳

而平當授九江朱普公文上黨鮑宣普為博士宣司隸校尉自有傳徒衆尤盛知名者也

夏侯勝其先夏侯都尉從濟南張生受尚書以傳族子

始昌始昌傳勝勝又事同郡蔭卿

師古曰蔭音姦

蔭卿者兒寬

門人勝傳從兄子建建又事歐陽高勝至長信少府建太子太傅自有傳由是尚書有大小夏侯之學

周堪字少卿齊人也與孔霸俱事大夏侯勝霸為博士堪譯官令論於石渠經為最高後為太子少傅而孔霸

以大中大夫授太子及元帝即位堪為光祿大夫與蕭

望之並領尚書事為石顯等所譖

○宋初曰越本邵本無等字

皆免

官望之自殺上愍之廼擢堪為光祿勳語在劉向傳堪

授牟卿

○宋初曰舊本卿作鄉

及長安許商長伯牟卿為博士霸

以帝師賜爵號褒成君傳子光

○宋初曰光字下更有光字

亦事牟

卿至丞相自有傳由是大夏侯有孔許之學商善為筭

著五行論歷四至九卿號其門人沛唐林子高為德行

平陵吳章偉君為言語重泉王吉少音為政事齊炗欽

幼卿為文學

師古曰依孔子弟子顏回以下為四科也
焮音桂○宋祁曰焮字詒曰今吳姓也韋

昭音翁
決反非

王莽時林吉為九卿自表上師冢大夫博士郎

更為許氏學者各從門人會車數百兩儒者榮之欽章

皆為博士徒衆尤盛章為王莽所誅

○宋祁曰越本作所誅也

張山拊字長賓平陵人也

師古曰拊音膚韋昭音杯又音甫尤反

事小夏

侯建為博士論石渠至少府授同縣李尋鄭寬中少君

山陽張無故子儒信都秦恭延君陳留假倉子驕無故

善修章句為廣陵太傅守小夏侯說文恭增師法至百

萬言

師古曰言小夏侯本所說之文不多而秦恭又更增益故至百萬言也

為城陽內史

倉以謁者論石渠至膠東相尋善說災異為騎都尉自

有傳寬中有雋材以博士授太子成帝即位賜爵關內

侯食邑八百戶遷光祿大夫領尚書事其尊重會疾卒

谷永上疏曰臣聞聖王尊師傅獲賢雋顯有功生則致

其爵祿死則異其禮諡昔周公薨成王葬以變禮而當

天心

師古曰周公死成王欲葬之於成周天乃雷雨以風永盡偃大木斯拔國人大恐王乃葬周公於畢

示不敢臣也事見尚書大傳與古文尚書不同

公叔文子卒衛侯加以美諡著

為後法

師古曰公叔文子衛大夫公孫發也文子卒其子請謚於君君曰昔者衛國凶饑夫子為粥與

國之餓者不亦惠乎衛國有難夫子以其死衛寡人不亦貞乎夫子聽衛國之政脩其班制以與四鄰交衛國

社稷不辱不亦文乎謂夫子貞惠文子事見禮記檀弓

近事大司空朱邑

劉敞曰空當

為農右扶風翁歸德茂天年孝宣皇帝憇冊厚賜贊命之

臣靡不激揚

師古曰贊佐也

關內侯鄭寬中有顏子之美質包

商偃之文學

師古曰論語云文學子游子夏商子夏名偃子游名

嚴然總五經之

眇論立師傅之顯位

師古曰嚴與儼同眇讀曰妙

入則鄉唐虞之閔

道王法納乎聖聽

師古曰鄉讀曰嚮閔大也言陳聖王之法聞於天子

出則參冢

宰之重職功列施乎政事退食自公私門不開

師古曰退食自

公召南羔羊詩之辭言貶退所食之祿而從至公之道也

散賜九族田畝不益德配

周召忠合羔羊未得登司徒有家臣

師古曰師徒掌禮教之官言寬中學

行堪為之也家臣若今諸公國官及府佐也

卒然早終尤可悼痛

師古曰卒讀曰卒

臣愚以為宜加其葬禮賜之令謚

師古曰令善也

以章尊師褒

賢顯功之德上弔贈寬中甚厚由是小夏侯有鄭張秦

假李氏之學寬中授東郡趙玄無故授沛唐尊恭授魯

馮賓賓為博士尊王莽太傅玄哀帝御史大夫至大官

知名者也

○宋祁曰淳化本越本無故字下更有無故二字馮賓字下更有一馮字刊誤謂當去無

故二字添

一賓字

孔氏有古文尚書孔安國以今文字讀之因以起其家

逸書得十餘篇蓋尚書茲多於是矣遭巫蠱未立於學

官安國為諫大夫授都尉朝

服虔曰朝名都尉姓

而司馬遷亦從

安國問故遷書載堯典禹貢洪範微子金縢諸篇多古

文說都尉朝授膠東庸生庸生授清河胡常少子

師古曰少

子亦常字也以明穀梁春秋為博士部刺史又傳左氏常授

號徐敖敖為右扶風掾又傳毛詩授王璜平陵塗暉子

真子真授河南桑欽君長王莽時諸學皆立

○宋祁曰
新本改論

作劉歆為國師璜暉等皆貴顯世所傳百兩篇者出東

萊張霸分析合二十九篇以為數十又采左氏傳書叙

為作首尾凡百二篇篇或數簡文意淺陋成帝時求其

古文者霸以能為百兩徵以中書校之非是

師古曰以
霸私增加

分析故與中書之文不同
也中書天子所藏之書也

霸辭受父父有弟子尉氏樊

並時大中大夫平當侍御史周敞勸上存之

師古曰存
者立其學

後樊並謀反廼黜其書

申公魯人也少與楚元王交俱事齊人浮丘伯受詩漢

興高祖過魯申公以弟子從師入見于魯南宮呂太后

時浮丘伯在長安楚元王遣子郢與申公俱卒學師古曰郢

即郢客也元王薨郢嗣立為楚王令申公傅太子戊戊不好

學病申公師古曰病苦也及戊立為王胥靡申公師古曰胥靡相係而作役

解具在楚元王傳也申公愧之歸魯退居家教終身不出門復謝

賓客師古曰身既不出門非受業弟子其獨王命召之

乃往弟子自遠方至受業者千餘人申公獨以詩經為

訓故以教亡傳

師古曰口說其指不為解說之傳

疑者則闕弗傳蘭陵

王臧既從受詩已通事景帝為太子少傅免去武帝初

即位臧乃上書宿衛累遷一歲至郎中令及代趙綰亦

嘗受詩申公為御史大夫綰臧請立明堂以朝諸侯不

能就其事

師古曰就成也

乃言師申公於是上使使束帛加璧

安車以蒲裹輪駕馬迎申公

○宋初曰景祐本改駕作加今兩存

弟子二

人乘軺傳從

師古曰傳音張戀反

至見上上問治亂之事申公時

已八十餘老對曰為治者不在多言顧力行何如耳師古

曰顧念也力行謂勉力為行也

是時上方好文辭見申公對默然然已

招致即以為大中大夫舍魯邸

師古曰舍止息也

議明堂事太

皇竇太后喜老子言不說儒術

師古曰喜音許既反說讀曰悅得綰臧

之過以讓上曰此欲復為新垣平也

師古曰讓責也

上因廢明

堂事下綰臧吏皆自殺申公亦病免歸數年卒弟子為

博士十餘人孔安國至臨淮太守周霸膠西內史夏寬

城陽內史碭魯賜東海太守蘭陵繆生長沙內史徐偃

膠西中尉鄒人闕門慶忌膠東內史

李奇曰姓闕門名慶忌

其治

官民皆有廉節稱其學官弟子行雖不備而至於大夫

郎掌故以百數申公卒以詩春秋授而瑕丘江公盡能

傳之徒衆最盛及魯許生免中徐公

蘇林曰免中縣名也李奇曰邑名也

師古曰李說是也

皆守學教授韋賢治詩事博士大江公及許

生晉灼曰大江公即瑕丘江公也以異下博士江公故稱大

又治禮至丞相傅子玄

成以淮陽中尉論石渠後亦至丞相玄成及兄子賞以

詩授哀帝至大司馬車騎將軍自有傳由是魯詩有韋

氏學

王式字翁思東平新桃人也事免中徐公及許生式為
昌邑王師昭帝崩昌邑王嗣立以行淫亂廢昌邑羣臣
皆下獄誅唯中尉王吉郎中令龔遂以數諫減死論式
繫獄當死治事使者責問曰師何以亡諫書式對曰臣
以詩三百五篇朝夕授王至於忠臣孝子之篇未嘗不
為王反復誦之也師古曰復音方目反至於危亡失道之君未嘗
不流涕為王深陳之也臣以三百五篇諫是以亡諫書

使者以聞亦得減死論歸家不教授山陽張長安幼君

李奇曰長安名先事武後東平唐長賓沛褚少孫亦來事武問

經數篇武謝曰聞之於師具是矣自潤色之

師古曰言所聞師說

具盡於此若嫌簡畧任更潤色

不肯復授唐生褚生應博士弟子選詣

博士摠衣登堂頌禮甚嚴

師古曰摠衣謂以手內舉之令離地也摠音口侯反頌讀

曰試誦說有法疑者丘蓋不言

蘇林曰丘蓋不言不知之意也如淳曰齊俗以

不知為丘師古曰二說皆非也論語載孔子曰蓋有不

知而作之者我無是也欲遵此意故效孔子自稱丘耳
蓋者發語之辭○劉敞曰予按荀卿書區蓋之間諸博
疑則不言區蓋近意也丘區聲相變殆謂此耳

士驚問何師對曰事式皆素聞其賢共薦式詔除下為

博士

師古曰下除官之書也下音胡嫁反

式徵來衣博士衣而不冠曰刑

餘之人何宜復充禮官既至止舍中會諸大夫博士共

持酒肉勞式皆注意高仰之

師古曰勞音來到反

博士江公世為

魯詩宗

師古曰為魯詩者所宗師也

至江公著孝經說心嫉式謂歌

吹諸生曰

如淳曰其學官自有此法酒坐歌吹以相樂也

歌驪駒

服虔曰逸詩篇名也見大

戴禮客欲去歌之文穎曰其辭云驪駒在門僕夫具存驪駒在路僕夫整駕也

式曰聞之於師

客歌驪駒主人歌客毋庸歸

文穎曰庸用也主人禮未畢且無用歸也○劉敞曰

尋文衍一客字驪駒者客將歸之歌主人無所歸不當歌也

今日諸君為主人日尚

早未可也江翁曰經何以言之

師古曰於經何所有此言式曰在曲

禮江翁曰何狗曲也

師古曰意怒故妄發言言狗者輕賤之甚也今流俗書本云何曲狗

妄改之也

式恥之陽醉邊墜

師古曰邊失據而倒也墜古地字邊音徒浪反○宋初曰邊古

作踢服虔音湯湯去豆皮之湯蕭該音勅宕反

式客罷讓諸生曰我本不欲來

師古曰讓責也

諸生彊勸我竟為豎子所辱遂謝病免歸終於

家張生唐生褚生皆為博士張生論石渠至淮陽中尉

唐生楚太傅由是魯詩有張唐褚氏之學張生兄子游

卿為諫大夫以詩授元帝其門人琅邪王扶為泗水中

尉陳留許晏為博士

○宋初曰尉字下當有授字

由是張家有許氏

學初薛廣德亦事王式以博士論石渠授龔舍廣德至御史大夫舍泰山太守皆有傳

轅固齊人也

○宋初曰固字下當有生字

以治詩孝景時為博士與

黃生爭論於上前黃生曰湯武非受命廼殺也固曰不然夫桀紂荒亂天下之心皆歸湯武湯武因天下之心而誅桀紂桀紂之民弗為使而歸湯武湯武不得已而

立非受命為何

師古曰此非受命更何為○宋祁曰注文師古曰下當有言字

黃生曰

冠雖敝必加於首履雖新必貫於足

師古曰語見太公六韜也

何者

上下之分也

師古曰分音扶問反

今桀紂雖失道然君上也湯武

雖聖臣下也夫主有失行臣不正言匡過以尊天子反

因過而誅之代立南面非殺而何固曰必若云

師古曰謂必如

黃生之言

是高皇帝代秦即天子之位非邪於是上曰食肉

毋食馬肝未為不知味也言學者毋言湯武受命不為

愚

師古曰馬肝有毒食之憲殺人幸得無食言湯武為殺是背經義故以為喻也○劉敞曰知味者不必須

食馬肝言學者不必須論湯武此欲令學者皆置之耳

遂罷竇太后好老子書召

問固固曰此家人言耳

師古曰家人言僮隸之屬○宋祁曰越本耳作矣

太后

怒曰安得司空城旦書乎

服虔曰道家以儒法為急比之於律令也

廼使固

入園擊彘上知太后怒而固直言無辜廼假固利兵

師古

曰假給與也利兵兵刃之利者

下固刺彘正中其心彘應手而倒太后

默然亡以復舉後上以固廉直拜為清河太傅疾免武

帝初即位復以賢良徵諸儒多嫉毀曰固老罷歸之時

固已九十餘矣公孫弘亦徵仄目而事固

師古曰言固深憚之

曰公孫子務正學以言無曲學以阿世諸齊以詩顯貴
皆固之弟子也昌邑太傅夏侯始昌最明自有傳

后蒼字近君東海邦人也事夏侯始昌始昌通五經蒼
亦通詩禮為博士至少府授翼奉蕭望之匡衡奉為諫
大夫望之前將軍衡丞相皆有傳衡授琅邪師丹伏理
游君潁川滿昌君都君都為詹事理高密太傅家世傳
業丹大司空自有傳由是齊詩有翼匡師伏之學滿昌
授九江張邯琅邪皮容皆至大官徒衆尤盛

韓嬰燕人也孝文時為博士景帝時至常山太傅嬰推

詩人之意而作內外傳數萬言其語頗與齊魯間殊然

歸一也淮南賁生受之

師古曰賁音肥

燕趙間言詩者由韓生

韓生亦以易授人推易意而為之傳燕趙間好詩故其

易微唯韓氏自傳之武帝時嬰嘗與董仲舒論於上前

其人精悍處事分明

師古曰悍勇銳

仲舒不能難也後其孫商

為博士孝宣時涿郡韓生其後也以易徵待詔殿中曰

所受易即先太傅所傳也嘗受韓詩不如韓氏易深太

傳故專傳之司隸校尉蓋寬饒本受易於孟喜見涿韓
生說易而好之即更從受焉

趙子河內人也事燕韓生授同郡蔡誼誼至丞相自有

傳誼授同郡食子公

○宋祁曰蕭該音義曰案風俗通曰食我韓公子也見戰國策漢有

食子公為博士食音嗣

與王吉吉為昌邑王中尉自有傳食生為

博士授泰山栗豐吉授淄川長孫順順為博士豐部刺

史由是韓詩有王食長孫之學豐授山陽張就順授東

海髮福皆至大官徒衆尤盛

毛公趙人也治詩為河間獻王博士授同國貫長卿長卿授解延年延年為阿武令授徐敖教授九江陳俠為王莽講學大夫由是言毛詩者本之徐敖

漢興魯高堂生傳士禮十七篇而魯徐生善為頌

蘇林曰漢

舊儀有二郎為此頌貌威儀事有徐氏徐氏後有張氏不知經但能盤辟為禮容天下郡國有容史皆詣魯學之師古曰頌讀與容同下皆類此。宋祁曰孝文時徐注文姚本刪徐氏二字能字下添揖讓二字

生以頌為禮官大夫傳子至孫延襄

師古曰延及襄二人

襄其資

性善為頌不能通經延頗能未善也襄亦以頌為大夫

至廣陵內史延及徐氏弟子公戶滿意桓生單次皆為

禮官大夫

師古曰姓公戶名滿意也與桓生及單次凡三人單音善

而瑕丘蕭奮以

禮至淮陽太守諸言禮為頌者由徐氏

孟卿東海人也事蕭奮以授后倉魯閭丘卿倉說禮數

萬言號曰后氏曲臺記

服虔曰在曲臺校書著說因以為名師古曰曲臺殿在未央宮

授沛聞人通漢子方

如淳曰聞人姓名通漢字子方

梁戴德延君戴

聖次君沛慶普孝公孝公為東平太傅德號大戴為信

都太傅聖號小戴以博士論石渠至九江太守由是禮

有大戴小戴慶氏之學通漢以太子舍人論石渠至中
山中尉普授魯夏侯敬又傳族子咸為豫章太守大戴
授琅邪徐良游卿為博士州牧郡守家世傳業小戴授
梁人橋仁季卿楊榮子孫師古曰子孫榮之字也○宋
祁曰景本作楊子榮新本作
楊榮
注同仁為大鴻臚家世傳業榮琅邪太守由是大戴有
徐氏小戴有橋楊氏之學

胡毋生字子都齊人也治公羊春秋為景帝博士與董
仲舒同業仲舒著書稱其德年老歸教於齊齊之言春

秋者宗事之公孫弘亦頗受焉而董生為江都相自有

傳弟子遂之者蘭陵褚大東平嬴公廣川段仲溫呂步

舒

師古曰遂謂名位成達者。宋祁曰遂之者當刪之字。劉敞曰遂之者之字衍。

大至梁相步

舒丞相長史唯嬴公守學不失師法為昭帝諫大夫授

東海孟卿魯睦孟孟為符節令坐說災異誅自有傳

嚴彭祖字公子東海下邳人也與顏安樂俱事睦孟孟

弟子百餘人唯彭祖安樂為明質問疑誼各持所見孟

曰春秋之意在二子矣孟死彭祖安樂各顯門教授師古

曰顯與專同專門言各自名家

由是公羊春秋有顏嚴之學彭祖為宣

帝博士至河南東郡太守

○宋初曰或無東字

以高第入為左馮

翊遷太子太傅廉直不事權貴或說曰天時不勝人事

君以不脩小禮曲意亡貴人左右之助經誼雖高不至

宰相願少自勉彊彭祖曰凡通經術固當脩行先王之

道何可委曲從俗苟求富貴乎彭祖竟以太傅官終授

琅邪王中為元帝少府

師古曰中讀曰仲

家世傳業中授同郡

公孫文東門雲雲為荊州刺史文東平太傅徒眾尤盛

雲坐為江賊拜辱命下獄誅

師古曰逢見賊而拜也

顏安樂字公孫

○宋祁曰一作翁孫

魯國薛人睦孟姊子也家貧

為學精力

○宋祁曰一作精力

官至齊郡太守丞後為仇家所殺

安樂授淮陽冷豐次君

師古曰冷音零

淄川任公公為少府豐

淄川太守由是顏家有冷任之學始貢禹事嬴公成於

睦孟至御史大夫疏廣事孟卿至太子太傅皆自有傳

廣授琅邪莞路

師古曰莞亦管字也○宋祁曰蕭該音義案草下完音九又音官今漢書本却

作草下完風俗通姓氏篇有管莞二姓云莞蘇楚大夫見呂氏春秋漢有莞路為御史中丞即此是也又有管

姓云管夷吾齊桓佐也見論語漢有管號為西河太守
今莞路是草下完非竹下完及竹下官由來讀者多惑

檢風俗
通乃知

路為御史中丞禹授潁川堂谿惠

師古曰姓
堂谿也惠

授泰山冥都

師古曰冥音莫零反○宋初曰蕭該案周
禮冥氏鄭司農云讀如冥氏春秋之冥劉

昌宗莫歷反案都治公羊春秋當是有所注述解釋公
羊故司農云冥氏春秋之冥風俗通姓氏篇冥侯國似
姓禹後見史記漢書有冥都為丞相都為丞相史都與路又事顏安樂故

顏氏復有莞冥之學路授孫寶為大司農自有傳豐授

馬宮琅邪左咸咸為郡守九卿徒眾尤盛官至大司徒

自有傳

○劉放曰
官改作宮

瑕丘江公受穀梁春秋及詩於魯申公傳子至孫為博

士武帝時江公與董仲舒竝仲舒通五經能持論善屬

文江公訥於口

師古曰屬音之欲反訥古訥字

上使與仲舒議不如仲

舒而丞相公孫弘本為公羊學比輯其議卒用董生

師古

曰比次也輯合也比音類寐反輯與集同

於是上因尊公羊家詔太子受公

羊春秋由是公羊大興太子既通復私問穀梁而善之

其後浸微

師古曰浸漸也

唯魯榮廣王孫皓星公二人受焉廣

盡能傳其詩春秋高才捷敏與公羊大師睦孟等論數

困之

師古曰孟等窮屈也

故好學者頗復受穀梁沛蔡千秋少君

梁周慶幼君丁姓子孫

師古曰姓丁名姓字子孫

皆從廣受千秋又

事皓星公為學最篤宣帝即位聞衛太子好穀梁春秋

以問丞相韋賢長信少府夏侯勝及侍中樂陵侯史高

皆魯人也言穀梁子本魯學公羊氏廼齊學也宜興穀

梁時千秋為郎召見與公羊家竝說上善穀梁說擢千

秋為諫大夫給事中後有過左遷平陵令復求能為穀

梁者莫及千秋上愍其學且絕廼以千秋為郎中戶將

師古曰戶將官名解
在楊惲蓋寬饒傳

選郎十人從受汝南尹更始翁君

本自事千秋能說矣會千秋病死徵江公孫為博士劉

向以故諫大夫通達待詔受穀梁欲令助之江博士復

死廼徵周慶丁姓待詔保宮

師古曰保宮少府之
屬官也本名居室

使卒

授十人自元康中始講至甘露元年積十餘歲皆明習

廼召五經名儒太子太傅蕭望之等大議殿中平公羊

穀梁同異各以經處是非時公羊博士嚴彭祖侍郎申

軌伊推宋顯

師古曰
軌音晚

穀梁議郎尹更始待詔劉向周慶

丁姓並論公羊家多不見從願請內侍郎許廣使者亦

並內穀梁家中郎王亥各五人

師古曰使者謂當時詔遣監議者也內謂引入

議所也公羊家既請內許廣而使者因並內王亥也

議三十餘事望之等十一人

各以經誼對多從穀梁由是穀梁之學大盛慶姓皆為

博士

師古曰周慶丁姓二人也

姓至中山太傅授楚申章昌曼君

李奇

曰姓申章名昌字曼君○宋祁曰蕭該音義曰晉灼作由章予案風俗通姓氏篇云由余秦相也見史記漢有由章至長沙太傅今宜作由章陽夏公案後言由是穀梁春秋有尹胡申章房氏之學則宜從李奇

為博

士至長沙太傅徒眾尤盛尹更始為諫大夫長樂戶將

又受左氏傳取其變理合者以為章句傳子咸及翟方進琅邪房鳳咸至大司農方進丞相自有傳

房鳳字子元不其人也

師古曰琅邪之縣也其音基

以射策乙科為

太史掌故太常舉方正為縣令都尉失官大司馬票騎將軍王根奏除補長史薦鳳明經通達擢為光祿大夫

遷五官中郎將時光祿勳王龔以外屬內卿

如淳曰邛成太后親

也內卿光祿勳治宮中

與奉車都尉劉歆共校書三人皆侍中歆

白左氏春秋可立哀帝納之以問諸儒皆不對歆於是

數見丞相孔光為言左氏以求助光卒不肯唯鳳龔許
歆遂共移書責讓太常博士語在歆傳大司空師丹奏
歆非毀先帝所立上於是出龔等補史龔為弘農歆河
內鳳九江太守至青州牧始江博士授胡常常授梁蕭
秉君房王莽時為講學大夫由是穀梁春秋有尹胡申
章房氏之學

漢興北平侯張蒼及梁太傅賈誼京兆尹張敞大中
夫劉公子皆脩春秋左氏傳誼為左氏傳訓故授趙人

貫公為河間獻王博士子長卿為蕩陰令

師古曰蕩陰河內之縣也

蕩音湯

授清河張禹長子

如淳曰非成帝師張禹也

禹與蕭望之同時

為御史數為望之言左氏望之善之上書數以稱說後

望之為太子太傅薦禹於宣帝徵禹待詔未及問會疾

死授尹更始

師古曰禹先授更始

更始傳子咸及翟方進胡常常

授黎陽賈護季君哀帝時待詔為郎授蒼梧陳欽子佚

以左氏授王莽至將軍而劉歆從尹咸及翟方進受由

是言左氏者本之賈護劉歆

贊曰自武帝立五經博士開弟子員設科射策勸以官

祿訖於元始百有餘年傳業者寢盛支葉蕃滋師古曰寢漸也

蕃多也一經說至百餘萬言大師衆至千餘人蓋祿利

之路然也師古曰言為經學者則受爵祿而獲其利所以益勸初書唯有歐陽禮

后易楊春秋公羊而已至孝宣世復立大小夏侯尚書

大小戴禮施孟梁丘易穀梁春秋至元帝世復立京氏

易平帝時又立左氏春秋毛詩逸禮古文尚書所以罔

羅遺失兼而存之是在其中矣如淳曰雖有虛妄之說是當在其中故兼而存

之

卷八十八

卷八十八

前漢書卷八十八

前漢書卷八十八考證

儒林傳故詳延天下方聞之士咸登諸朝注師古曰方

道也云云○

臣召南

按史記作詳延天下方正博聞

之士義甚明邕當是漢書寫本脫正博二字而師古

因曲為之說耳

殷曰庠周曰序○史記作殷曰序周曰庠與孟子同

郡國縣官○

臣召南

按史記作郡國縣道邑是也此文

有脫誤耳縣有蠻夷曰道列侯公主所食曰邑謂屬

於郡或國之縣及道與邑也漢時稱朝廷曰縣官故
凡言令長不曰縣官也

而請諸能稱者注師古云云○臣召南按史記作而請

諸不稱者罰此文祇換一不字省一罰字義遂不同
史記言懲儆濫舉此文言登進賢才也

自魯商瞿子木云云○臣召南按史記祇云商瞿傳易

六世至田何未嘗詳六世姓字也自橋庇子庸至孫
虞子乘皆班氏所補又田何子裝史記作子莊班氏

當以避明帝諱而改曰裝耳

要言易者本之田何。按史記作然要言易者本於楊何之家

費直傳琅邪王璜平中能傳之。按王璜溝洫志作王橫

高相傳東郡太守翟誼。按本傳作翟義義誼古字通用蔡義亦或作蔡誼

伏生傳於是詔太常使掌故朝錯往受之。臣召南按

朝鼂二字通用據後漢書何敞傳敞之祖何比干學尚書於錯也

齊學者由此頗能言尚書○臣召南按史記但云學者

由此頗能言尚書此文似衍齊字然以上下文推之
又似齊字下脫魯字如云齊魯學者於文甚順也

申公傳弟子自遠方至受業者千餘人○臣召南按千

餘人史記作百餘人下文言申公弟子為博士者十
餘人大夫郎掌故以百數則此文作千餘人是也又

按申公為魯詩之師又為穀梁春秋之師故下文言申公卒以詩春秋授而瑕邱江公盡能傳之也

轅固傳履雖新必貫於足○按貫字史記作關

胡毋生傳弟子遂之者○臣召南按史記作仲舒弟子

通者又東平嬴公史記無而廣川段仲史記作殷忠

前漢書卷八十八考證

欽定四庫全書

前漢書卷八十九

漢 蘭 臺 令 史班 固撰

唐正議大夫行祕書少監琅邪縣開國子顏師古注

循吏傳第五十九

師古曰循順也上順
公法下順人情也

漢興之初反秦之敝與民休息凡事簡易禁罔疏闊而
相國蕭曹以寬厚清靜為天下帥師古曰帥古曰民作畫一之

歌師古曰謂歌曰蕭何為法講若畫一曹參代之守而勿失

孝惠垂拱高后女主不

出房闈而天下晏然民務稼穡衣食滋殖

師古曰滋益也殖生也

至于文景遂移風易俗是時循吏如河南守吳公蜀守

文翁之屬皆謹身帥先居以廉平不至於嚴而民從化

孝武之世外攘四夷內改法度

師古曰攘却也

民用彫敝姦軌

不禁

師古曰不可禁

時少能以化治稱者唯江都相董仲舒內

史公孫弘兒寬居官可紀三人皆儒者通於世務明習

文法以經術潤飾吏事天子器之仲舒數謝病去弘寬

至三公孝昭幼冲霍光秉政承奢侈師旅之後海內虛

耗光因循守職無所改作至於始元元鳳之間匈奴鄉

化

師古曰鄉讀曰嚮

百姓益富舉賢良文學問民所疾苦於是

罷酒榷而議鹽鐵矣及至孝宣繇仄陋而登至尊

師古曰仄

古側字仄陋言非正統而身經微賤也繇與由同以下類此

興于閭閻

師古曰閭里門也閭里中

門也言從里巷而即大位也

知民事之難難自霍光薨後始躬萬機

厲精為治五日一聽事自丞相已下

○宋祁曰已字當作以

各奉

職而進及拜刺史守相輒親見問觀其所繇退而考察

所行以質其言

師古曰質正也

有名實不相應必知其所以然

常稱曰庶民所以安其田里而亡歎息愁恨之心者政

平訟理也

師古曰訟理言所訟見理而無寬滯也

與我共此者其唯良二

千石乎

師古曰謂郡守諸侯相

以為太守吏民之本也

○宋祁曰越本無也

字姚本刪

數變易則下不安民知其將久不可欺罔迺服從

其教化故二千石有治理效輒以璽書勉厲增秩賜金

或爵至關內侯公卿缺則選諸所表以次用之

師古曰所表謂

增秩賜金爵也

是故漢世良吏於是為盛稱中興焉若趙廣漢

韓延壽尹翁歸嚴延年張敞之屬皆稱其位然任刑罰

或抵罪誅

師古曰抵至也音丁禮反

王成黃霸朱邑龔遂鄭弘召信

臣等

師古曰召讀曰邵

所居民富所去見思生有榮號死見奉

祀此廩廩庶幾德讓君子之遺風矣

師古曰廩廩言有風采也

文翁廬江舒人也少好學通春秋以郡縣吏察舉景帝

末為蜀郡守仁愛好教化見蜀地辟陋有蠻夷風

師古曰辟

讀曰僻

文翁欲誘進之乃選郡縣小吏開敏有材者張叔

等十餘人親自飭厲

師古曰飭與敕同

遣詣京師受業博士或

學律令減省少府用度買刀布蜀物齋計吏以遺博士

如淳曰金馬書刀今賜計吏是也作馬形於刀環內以金鏤之晉灼曰刀書刀布布刀也舊時蜀郡工官作金

馬書刀者似佩刀形金錯其拊布刀謂婦人割裂財布刀也師古曰少府郡掌財物之府以供太守者也刀凡

蜀刀有環者也布蜀布細密環也二者蜀人作之皆善故齋以為貨無限於書刀布刀也如晉二說皆煩而不

當也○宋祁曰注文細密環也數歲蜀生皆成就還歸

景本據史館本改作細密者也

文翁以為右職師古曰郡中用次察舉官有至郡守刺史

者又脩起學官於成都市中師古曰學官學之官舍也招下縣子弟

以為學官弟子

師古曰下縣四郊之縣非郡所治也為除更繇師古曰不令從役也

更音工衛反
繇讀曰繇

高者以補郡縣吏次為孝弟力田常選學

官僮子使在便坐受事

師古曰便坐別坐可以視事非正廷也坐音財卧反

每出

行縣益從學官諸生明經飭行者與俱

師古曰益多也飭整也讀與較

同使傳教令出入閨閣

師古曰閨閣內中小門也

縣邑吏民見而榮

之數年爭欲為學官弟子富人至出錢以求之繇是大

化

師古曰繇讀曰由

蜀地學於京師者比齊魯焉至武帝時乃

今天下郡國皆立學校官自文翁為之始云文翁終於蜀吏民為立祠堂歲時祭祀不絕至今巴蜀好文雅文

翁之化也

師古曰文翁學堂于今猶在益州城內

王成不知何郡人也為膠東相治甚有聲宣帝最先褒

之地節三年下詔曰蓋聞有功不賞有罪不誅雖唐虞

不能以化天下今膠東相成勞來不怠

師古曰謂勸勉招懷百姓也勞

音郎到反來音郎代反

流民自占八萬餘口

師古曰隱度民數而來附業也占音之贍

反治有異等之效

師古曰異於常等

其賜成爵闕內侯秩中二

千石未及徵用會病卒官後詔使丞相御史問郡國上

計長吏守丞以政令得失或對言前膠東相成偽自增

加以蒙顯賞是後俗吏多為虛名云

○劉攽曰長史守丞吏當作史郡使

守丞國使長史皆一物也故總言郡國上計長史守丞後漢百官志諸侯王相如太守長史如郡丞又邊郡有丞元有長史長史上計無疑矣長史者通於令丞尉之稱與守丞連言之說不可不爾下言長史守丞同

黃霸字次公淮陽夏人也

師古曰夏音工雅反

以豪桀役使徒

雲陵

師古曰身為豪桀而役使鄉里人也

霸少學律令喜為吏

師古曰喜謂愛好也

音許吏反

武帝末以待詔入錢賞官補侍郎謁者

孟康曰賞官主賞賜

之官也師古曰此說非也因入錢而見賞以官○宋祁曰姚本正文刪以字

坐同產有罪劾

免

師古曰同產謂兄弟也○宋祁曰景本無罪字

後復入穀沈黎郡補左馮翊

二百石卒史

如淳曰三輔郡得任用他郡人而卒史獨二百石所謂尤異者也

馮翊以

霸入財為官不署右職

師古曰輕其為人也右職高職也

使領郡錢穀

計

師古曰計謂出入之數也

簿書正以廉稱

師古曰言無所侵隱故簿書皆正不虛謬也

察補河東均輸長

師古曰以廉見察而遷補

復察廉為河南太守丞

霸為人明察內敏

師古曰內敏言心思捷疾也

又習文法然溫良有

讓足知善御衆為丞處議當於法合人心太守甚任之

吏民愛敬焉自武帝末用法深昭帝立幼大將軍霍光

秉政大臣爭權上官桀等與燕王謀作亂光既誅之遂

遵武帝法度以刑罰痛繩羣下繇是俗吏尚嚴酷以為

能師古曰繇讀與由同而霸獨用寬和為名會宣帝即位於民間

時知百姓苦吏急也聞霸持法平名以為廷尉正數決

疑獄庭中稱平師古曰此庭中謂廷尉之中守丞相長

史坐公卿大議庭中師古曰大議總會議也知長信少

府夏侯勝非議詔書大不敬霸阿從不舉劾皆下廷尉

師古曰勝及霸俱下廷尉繫獄當死霸因從勝受尚書獄中再隄冬

師古曰隄與踰同積三歲廼出語在勝傳勝出復為諫大夫令

左馮翊宋畸舉霸賢良勝又口薦霸於上上擢霸為揚

州刺史三歲宣帝下詔曰制詔御史其以賢良高第揚

州刺史霸為潁川太守秩比二千石居官賜車蓋持高

一丈別駕主簿車緹油屏泥於軾前以章有德

○宋祁曰景本

越本自賜車蓋止以章有德無此二十三字

時上垂意於治數下恩澤詔書

吏不奉宣

師古曰不令百姓皆知也

太守霸為選擇良吏分部宣布

詔令

師古曰分音扶問反○宋祁曰太守當在為字下劉攽曰太守字當在霸為字下

令民咸

知上意使郵亭鄉官皆畜雞豚

師古曰郵亭書舍謂傳送文書所止處亦如今

之驛館矣鄉官者鄉所治處也以贍鰥寡貧窮者然後為條教置父老

師帥伍長班行之於民間勸以為善防姦之意及務耕

桑節用殖財種樹畜養去食穀馬米鹽靡密初若煩碎

師古曰米鹽言雜而且細然霸精力能推行之吏民見者語次尋繹

師古曰繹謂抽引而出也問它陰伏以相參考嘗欲有所司察擇長

年廉吏遣行屬令周密師古曰屬戒也周密不吏出不

敢舍郵亭師古曰舍止也食於道旁烏攫其肉師古曰攫搏持

反○宋祁曰攫說文曰梓也音九縛反民有欲詣府口言事者適見之霸

與語道此後曰吏還謁霸霸見迎勞之曰甚苦食於道

旁乃為烏所盜肉吏大驚以霸具知其起居所問豪釐

不敢有所隱鰥寡孤獨有死無以葬者鄉部書言霸具

為區處師古曰區處謂分別而處置也音昌女反某所大木可以為棺某亭

猪子可以祭○宋祁曰猪當作猪吏往皆如言其識事聰明如此

師古曰識記也音式二反吏民不知所出師古曰不知其用何術也咸稱神明姦

人去入它郡盜賊日少霸力行教化而後誅罰師古曰力猶勤

也言先以德教化於下若有弗從然後用刑罰也務在成就全安長吏師古曰不欲易

代及損傷之也

許丞老病聾

如淳曰許縣丞

督郵白欲逐之霸曰許丞

廉吏雖老尚能拜起送迎正頗重聽何傷且善助之毋

失賢者意或問其故霸曰數易長吏送故迎新之費及

姦吏緣絕簿書盜財物

師古曰緣因也因交代之際而棄匿簿書以盜官物也

公

私費耗甚多皆當出於民所易新吏又未必賢或不如

其故徒相益為亂凡治道去其泰甚者耳霸以外寬內

明得吏民心戶口歲增治為天下第一徵守京兆尹秩

二千石坐發民治馳道不先以聞又發騎士詣北軍馬

不適士

孟康曰闕西人謂補滿為適馬少士多不相補滿也。○宋祁曰不先以聞姚本作不先聞蕭該

音義適適足也。適音相代。反韋昭音詩歷反。案今漢書適字作適字。注云適始歷反。予謂與韋昭音同。

効

乏軍興連貶秩有詔歸潁川太守官以八百石居治如

其前前後後八年郡中愈治是時鳳凰神爵數集郡國潁

川尤多天子以霸治行終長者下詔稱揚曰潁川太守

霸宣布詔令百姓鄉化

師古曰鄉讀曰嚮下亦同

孝子弟弟貞婦順

孫日以衆多田者讓畔道不拾遺養視鰥寡瞻助貧窮

獄或八年亡重罪囚吏民鄉于教化興於行誼可謂賢

人君子矣書不云乎股肱良哉

師古曰虞書益稷之辭已解於上

其賜

爵關內侯黃金百斤秩中二千石而潁川孝弟有行義民三老力田皆以差賜爵及帛後數月徵霸為太子太

傅遷御史大夫五鳳三年

○宋祁曰景本三作二

代丙吉為丞相

封建成侯食邑六百戶霸材長於治民及為丞相總綱紀號令風采不及丙魏于定國功名損於治郡時京兆

尹張敞舍鶡雀飛集丞相府

蕪林曰今虎賁所著鶡也師古曰蕪說非也此鶡音

芬字本作鴝此通用耳鴝雀大而色青出苑中非武賁所著也武賁鶡色黑出上黨以其鬪死不止故用其尾

飾武臣首云今時俗人所謂鷓鴣者也音曷非此鷓鴣也。宋祁曰注文鷓音介字本作鴣今本誤作芥竝鴣字予見徐鉉本改芥為介鴣為鴣案許慎說文鴣音古拜反鳥似鷓而色青出羗中與師古所引合徐改為允鴣是鳥聚貌非鳥名

霸以為神雀議欲以聞敞奏霸曰竊見丞相

請與中二千石博士雜問郡國上計長吏

宋祁曰吏當作史

守

丞為民興利除害成大化條其對有耕者讓畔男女異

路道不拾遺及舉孝子弟弟貞婦者為一輩先上殿

師古

曰丞相所坐屋也古者屋之高嚴通呼為殿不必宮中也。宋祁曰景本無弟弟字

舉而不知其

人數者次之不為條教者在後叩頭謝丞相

宋祁曰邵本無後

字當作
在後

雖口不言而心欲其為之也長吏守丞對

○宋
祁曰

吏當作史下文
上計長吏同

時臣敞舍有鷦雀飛止丞相府屋上丞

相以下見者數百人邊吏多知鷦雀者問之皆陽不知

丞相圖議上奏

師古曰
圖謀也

曰臣聞上計長吏守丞以興化

條

師古曰凡言條者一一
而疏舉之若木條然

皇天報下神雀後知從臣敞

舍來乃止郡國吏竊笑丞相仁厚有知畧微信竒怪也

昔汲黯為淮陽守辭去之官謂大行李息曰御史大夫

張湯懷詐阿意以傾朝廷公不早白與俱受戮矣息畏

湯終不敢言後湯誅敗上聞黯與息語乃抵息罪而秩

黯諸侯相取其思竭忠也臣敵非敢毀丞相也誠恐羣

臣莫白而長吏守丞

○宋祁曰吏當作史

畏丞相指歸舍法令各

為私教

師古曰舍廢也

務相增加澆淳散撲

師古曰不雜為淳以水流之則味漓

薄樸大質也割之則散也

並行偽貌有名亡實傾搖解怠甚者為妖

師古曰解讀曰懈

假令京師先行讓畔異路道不拾遺其實亡

益廉貪貞淫之行而以偽先天下固未可也即諸侯先

行之偽聲軼於京師非細事也

師古曰軼過也音逸

漢家承敝通

變造起律令即以勸善禁姦條貫詳備不可復加宜令

貴臣明飭長吏守丞

師古曰飭讀與勅同以下類此○宋祁曰吏當作史

歸告二

千石舉三老孝弟力田孝廉廉吏務得其人郡事皆以

義法令檢式

師古曰檢局也音居倫反○宋祁曰郡字疑作群字

毋得擅為條教

敢挾詐偽以奸名譽者必先受戮

師古曰奸求也音干

以正明好

惡天子嘉納敞言召上計吏使侍中臨飭如敞指意霸

甚慙又樂陵侯史高以外屬舊恩侍中貴重霸薦高可

太尉天子使尚書召問霸太尉官罷久矣丞相兼之所

以偃武興文也如國家不虞邊境有事

師古曰如若也

左右之

臣皆將帥也夫宣明教化通達幽隱使獄亡寃刑邑亡

盜賊君之職也將相之官朕之任焉

師古曰言欲拜將相事自在朕也

侍中樂陵侯高帷幄近臣朕之所自親

師古曰具知其材質

君何

越職而舉之尚書令受丞相對霸免冠謝罪數日乃決

師古曰乃得免罪

自是後不敢復有所請然自漢興言治民吏

以霸為首為丞相五歲甘露三年薨諡曰定侯霸死後

樂陵侯高竟為大司馬

師古曰史著此者亦言霸奏高為太尉適事宜也

霸子

思侯賞嗣為關都尉薨子忠侯輔嗣至衛尉九卿薨子

忠嗣侯訖王莽迺絕子孫為吏二千石者五六人始霸

少為陽夏游徼

師古曰游徼主徼巡盜賊者也

與善相人者共載出

師古

曰同乘車

見一婦人相者言此婦人當富貴不然相書不可

用也霸推問之乃其鄉里巫家女也霸即娶為妻與之
終身為丞相後徙杜陵

朱邑字仲卿廬江舒人也少時為舒桐鄉嗇夫廉平不

苛以愛利為行

師古曰仁愛於人而安利也

未嘗笞辱人存問耆老

孤寡遇之有恩所部吏民愛敬焉遷補太守卒史舉賢
良為大司農丞遷北海太守以治行第一入為大司農
為人淳厚篤於故舊然性公正不可交以私天子器之

朝廷敬焉是時張敞為膠東相與邑書曰明主游心太

古廣延茂士

師古曰茂善也

此誠忠臣竭思之時也直敞遠守

劇郡馭於繩墨

師古曰直讀曰值

匈臆約結固亡竒也

師古曰約屈也

雖有亦安所施

師古曰言在遠郡無足展效也○宋祁曰注文舊作放姚本改作效

足下

以清明之德掌周稷之業

師古曰司農主百穀故云周稷之業

猶饑者甘

糟糠穰歲餘梁肉

師古曰穰歲豐穰之歲穰音攘

何則有亡之勢異也

昔陳平雖賢須魏倩而後進

蘇林曰魏無知也韋昭曰無知字也師古曰倩士之

美稱故云魏倩也而韋氏便以為無知之字非也譬猶謂汲黯為汲直黯豈字直乎且次下句云賴蕭公而後信亦非何

韓信雖奇賴蕭公而後信

師古曰信謂為君上所信任也一說

信讀曰伸得伸其材用也

故事各達其時之英俊

○宋祁曰事當作士

若必伊

尹呂望而後薦之則此人不因足下而進矣

師古曰言能自達也

邑感敵言貢薦賢士大夫多得其助者身為列卿居處

儉節祿賜以共九族鄉黨

師古曰共讀曰供

家亡餘財神爵元

年卒天子閔惜下詔稱揚曰大司農邑廉潔守節退食

自公亡疆外之交東脩之餽

師古曰餽與饋同○宋祁曰亡疆景本作亡疆

可

謂淑人君子遭離凶災朕甚閔之

師古曰離亦遭

其賜邑子黃

金百斤以奉其祭祀初邑病且死屬其子

師古曰屬音之欲反曰

我故為桐鄉吏其民愛我必葬我桐鄉後世子孫奉嘗

我不如桐鄉民

師古曰嘗謂蒸嘗之祭

及死其子葬之桐鄉西郭

外民果然共為邑起冢立祠歲時祠祭至今不絕

龔遂字少卿山陽南平陽人也以明經為官至昌邑郎

中令事王賀賀動作多不正遂為人忠厚剛毅有大節

內諫爭於王外責傅相引經義陳禍福至於涕泣蹇蹇

亡已

師古曰蹇蹇不阿順意也易蹇卦曰王臣蹇蹇

面刺王過王至掩耳起走

曰郎中令善媿人

師古曰媿古愧字愧辱也

及國中皆畏憚焉

師古曰王

及國人皆憚之

王嘗久與騶奴宰人遊戲飲食賞賜亡度遂入

見王涕泣彳行左右侍御皆出涕王曰郎中令何為哭

遂曰臣痛社稷危也願賜清閒竭愚王辟左右

師古曰閒讀曰

開辟音闢

遂曰大王知膠西王所以為無道亡乎王曰不知

也曰臣聞膠西王有諛臣侯得王所為儼於桀紂也

師古

曰儼比也得以為堯舜也王說其諂諛嘗與寢處

師古曰說讀曰悅

唯得所言以至於是

師古曰唯用得之邪言故至亡

今大王親近羣小

漸漬邪惡所習存亡之機不可不慎也臣請選郎通經

術有行義者與王起居坐則誦詩書立則習禮容宜有

益王許之遂廼選郎中張安等十人侍王居數日王皆

逐去安等久之宮中數有妖怪王以問遂遂以為有大

憂宮室將空語在昌邑王傳會昭帝崩亡子昌邑王賀

嗣立官屬皆徵入王相安樂遷長樂衛尉遂見安樂流

涕謂曰王立為天子日益驕溢諫之不復聽今哀痛未

盡

師古曰謂新居喪服

日與近臣飲食作樂鬪虎豹名皮軒車九

流驅馳東西所為諄道

師古曰諄乖也音布內反

古制寬大臣有隱

退今去不得陽狂恐知身死為世戮奈何君陛下故相

宜極諫爭王即位二十七日卒以淫亂廢昌邑群臣坐

陷王於惡不道皆誅死者二百餘人唯遂與中尉王陽

以數諫爭得減死髡為城旦宣帝即位久之勃海左右

郡歲饑盜賊並起

師古曰左右謂側近相次者

二千石不能禽制上

選能治者丞相御史舉遂可用上以為勃海太守時遂

年七十餘召見形貌短小宣帝望見不副所聞心內輕

焉謂遂曰勃海廢亂朕甚憂之君欲何以息其盜賊以

稱朕意遂對曰海瀕遐遠不需聖化

師古曰瀕涯也音頻又音賓

其

民困於饑寒而吏不恤故使陛下赤子盜弄陛下之兵

於潢池中耳

師古曰赤子猶言初生幼小之意也積水曰潢音黃

今欲使臣勝之

邪將安之也

師古曰勝謂以威力克而殺之安謂以德化撫而安之

上聞遂對甚

說師古曰說讀曰悅

荅曰選用賢良固欲安之也遂曰臣聞治

亂民猶治亂繩不可急也唯緩之然後可治臣願丞相

御史且無拘臣以文法得一切便宜從事上許焉加賜

黃金贈遣乘傳至勃海界

師古曰傳音張戀反

郡聞新太守至發

兵以迎遂皆遣還移書勅屬縣悉罷遂捕盜賊吏諸持

鉏鉤田器者皆為良民吏毋得問

師古曰鉤鎌也

持兵者廼為

盜賊遂單車獨行至府郡中翕然盜賊亦皆罷

師古曰罷讀曰

疲言為盜賊久心亦疲厭○劉奉世曰盜賊與劫畧相
隨史以為二事故前云盜賊亦皆罷後云劫畧者去兵

未乃總云盜賊於是悉平民矣師古疑前未嘗言皆罷
故解為疲字乃非遂功矣但如字讀之文意自通 勃

海又多劫畧相隨聞遂教令即時解散棄其兵弩而持

鉤鉏盜賊於是悉平民安土樂業遂廼開倉廩假貧民

師古曰假謂給與選用良吏尉安牧養焉遂見齊俗奢侈好末

技不田作廼躬率以儉約勸民務農桑今口種一樹榆

百本蠶五十本葱一畦韭師古曰每一口即如此種也家二母彘五

雞師古曰每一家則如此養之也民有帶持刀劍者使賣劍買牛賣刀

買犢曰何為帶牛佩犢春夏不得不趨田畝師古曰趨讀曰趣趣

也嚮秋冬課收斂益畜果實菱芡勞來循行郡中皆有畜

積

師古曰菱芡也芡難頭也勞來勸勉也畜讀曰蓄芡音儉勞音盧到反來音盧代反

吏民皆富

實獄訟止息數年上遣使者徵遂議曹王生願從功曹

以王生素者酒亡節度不可使

師古曰者讀曰嗜

遂不忍逆從

至京師王生日飲酒不視太守

師古曰日日恒飲酒也

會遂引入

宮王生醉從後呼曰

師古曰呼音火故反

明府且止願有所白遂

還問其故

師古曰還回也

王生日天子即問君何以治勃海君

不可有所陳對宜曰皆聖主之德非小臣之力也遂受

其言既至前上果問以治狀遂對如王生言天子說其

有讓

師古曰說讀曰悅

笑曰君安得長者之言而稱之遂因前

曰臣非知此乃臣議曹教戒臣也上以遂年老不任公

卿拜為水衡都尉議曹王生為水衡丞以褻顯遂云水

衡典上林禁苑共張宮館

師古曰共音居用反張音知亮反下亦同

為宗廟

取牲官職親近上甚重之以官壽卒

師古曰以壽終而卒於官也

召信臣字翁卿九江壽春人也

師古曰召讀曰邵

以明經甲科

為郎出補穀陽長舉高第遷上蔡長其治視民如子所

居見稱述超為零陵太守病歸復徵為諫大夫遷南陽

太守其治如上蔡信臣為人勤力有方畧好為民興利

務在富之躬勸耕農出入阡陌止舍離鄉亭

師古曰言
休息之時

皆在
野次稀有安居時行視郡中水泉

師古曰行
音下更反

開通溝瀆

起水門提閘凡數十處

師古曰閘所以
壅水音一曷反

以廣溉灌歲歲

增加多至三萬頃民得其利畜積有餘

師古曰畜
讀曰蓄

信臣

為民作均水約束

師古曰言用
之有次第也

刻石立於田畔以防分

爭禁止嫁娶送終奢靡務出於儉約府縣吏家子弟好

游教不以田作為事輒斥罷之甚者素其不法以視好

惡

師古曰視
讀曰示

其化大行郡中莫不耕稼力田百姓歸之

戶口增倍盜賊獄訟衰止吏民親愛信臣號之曰召父
荊州刺史奏信臣為百姓興利郡以殷富賜黃金四十
斤遷河南太守治行常為第一復數增秩賜金竟寧中
徵為少府列於九卿奏請上林諸離遠宮館稀幸御者
勿復繕治共張又奏省樂府黃門倡優諸戲及宮館兵
弩什器減過太半太官園種冬生葱韭菜茹覆以屋廡

師古曰廡周室也茹音人廡反廡音舞

晝夜難蘊火待溫氣乃生

師古曰難古然

字蘊火蓄火也蘊音於云反

信臣以為此皆不時之物有傷於人不

宜以奉供養及宅非法食物悉奏罷省費歲數千萬

師古

曰素所費者今皆省也

信臣年老以官卒元始四年詔書祀百辟

卿士有益於民者

師古曰百辟百官

蜀郡以文翁九江以召父

應詔書歲時郡二千石率官屬行禮奉祠信臣冢而南

陽亦為立祠

前漢書卷八十九

前漢書卷八十九考證

循吏傳以寬厚清靜為天下帥注師古曰帥導也○臣

召南按帥是率先之意顏注非也

文翁傳蜀地學于京師者比齊魯焉○臣召南按蜀志

秦宓曰文翁遣司馬相如東受七經還教吏民然則相如即文翁所拔以為蜀人師者其語與地理志所云繇文翁倡其教相如為之師者正合但此傳及相如傳並無明文

文翁之化也注師古曰文翁學堂於今猶在益州城內

○ 臣召南

按文翁學堂即石室講堂也水經注曰文

翁為蜀守立講堂作石室於南城後守更增二石室

顏有意益州學館記曰華陽國志文翁講堂石室一

名玉堂安帝初間烈火為災惟石室獨存至獻帝興

平元年太守高暉於玉堂東更造一石室為周公禮

殿唐志有益州文翁學堂圖一卷

黃霸傳風采不及丙魏于定國○

臣召南

按此總計考

宣朝名相而言霸前不及丙魏後不及定國也定國
為相實在霸後

君何越職而舉之。○胡三省曰丞相職總百官進賢退
不肖霸薦史高以為所薦非其人可也以為越職則
不可也蓋自武帝以來丞相之失其職也久矣臣召

南按自武帝以後外廷之官統于丞相中朝之官統
于大司馬霸以丞相而舉史高堪大司馬故以越職
責之

朱邑傳少時為舒桐鄉嗇夫。○按鄉吏之有秩者曰三老曰嗇夫曰游徼嗇夫職聽訟獄收賦稅

龔遂傳拜為水衡都尉。○臣召南按公卿表遂以地節

四年為水衡都尉即朱邑以北海太守入為大司農之歲也

召信臣傳起水門提閘凡數十處。○臣召南按提應作

堤又按信臣於南陽水利無所不興其最鉅者鉗盧陂六門竭並在穰縣之南灌溉穰新野昆陽三縣後

漢杜詩修其故迹民有召父杜母之歌晉杜預復其
遺規地有二十九陂之利故讀後書晉書及水經注
通典而嘆信臣功在南陽並於蜀李冰鄴史起也顏
注太畧

前漢書卷八十九考證